

**ZAKON
O IZMJENAMA I DOPUNAMA ZAKONA O PRIVATIZACIJI PREDUZEĆA**

Član 1.

U Zakonu o privatizaciji preduzeća ("Službene novine Federacije BiH", br. 27/97, 8/99, 32/00, 45/00, 54/00, 61/01, 27/02 i 33/02) u članu 7. iza stava 2. dodaju se st. 3. i 4. koji glase:

"Na Program privatizacije preduzeća i početnih bilansa u preduzećima iz člana 1. ovog zakona, koja se dijele u skladu sa Zakonom o privrednim društvima ("Službene novine Federacije BiH", br. 23/99, 45/00, 2/02, 6/02 i 29/03) i Zakonom o stečajnom postupku ("Službene novine Federacije BiH", broj 29/03) saglasnost daju nadležne vlade koje upravljaju državnim kapitalom u tom preduzeću i Federalna agencije za privatizaciju.

Upis dijelova preduzeća iz stava 3. ovog člana u registar društava vrši se po okončanju privatizacije tih dijelova."

Član 2.

Član 11. mijenja se i glasi:

"Privatizacija preduzeća u skladu sa ovim zakonom vrši se prodajom kapitala, dionica, imovine i udjela preduzeća u drugom pravnom licu.

O načinu, odnosno metodu privatizacije odlučuje vlada nadležna za upravljanje državnim kapitalom u tom preduzeću, a postupak privatizacije u skladu sa ovim zakonom i odlukom provodi Agencija za privatizaciju kantona, odnosno Federacije BiH u zavisnosti od toga koja vlada ostvaruje pravo upravljanja u tom preduzeću.

Privatizacija preduzeća može se vršiti i privatizacijom dijelova preduzeća nastalih podjelom preduzeća na više dijelova kao samostalnih tehno-ekonomskih cjelina.

Privatizacija iz stava 3. ovog člana smatra se prodajom u velikoj privatizaciji.

Pravila prodaje kapitala i imovine preduzeća kada se vrši podjela, utvrđuje vlada nadležna za upravljanje državnim kapitalom u tom preduzeću u roku od 60 dana od dana stupanja na snagu ovog zakona."

Član 3.

Član 12. mijenja se i glasi:

"U postupku privatizacije, prema ovom zakonu, preduzeća ili imovinu preduzeća mogu kupovati sva domaća i strana fizička i pravna lica.

Izuzetno, u postupku privatizacije, prema ovom zakonu, ne mogu učestvovati:

- preduzeća koja su i sama predmet privatizacije;
- fizička i pravna lica koja imaju neizmirene obaveze po osnovu javnih prihoda za prethodni izvještajni period;
- preduzeća za koja je samo pravosnažnom sudskom presudom utvrđeno da su poslovala sa preduzećima koja su brisana iz sudskog registra, saglasno članu 52. a tačka 3. Zakona o postupku upisa pravnih lica u sudski registar ("Službene novine Federacije BiH", br. 4/00, 19/00, 49/00, 32/01, 14/02, 13/03, 19/03 i 50/03);
- preduzeća koja su u većinskom vlasništvu preduzeća iz alineja 2. i 3. ovog člana;
- fizička lica u čijem većinskom vlasništvu su preduzeća iz alineja 2. i 3. ovog člana;

– strana fizička i pravna lica u slučajevima kada je zakonom ograničeno ili isključeno njihovo vlasništvo nad domaćim preduzećima."

Član 4.

Član 31. mijenja se i glasi:

"Neprivatiziranim dionicama, kapitalom i imovinom preduzeća po izvršenju programa privatizacije i početnog bilansa stanja upravlja i raspolaže vlada nadležna za upravljanje državnim kapitalom u tom preduzeću.

Upise u registrima društava neprivatiziranih dionica u državnom vlasništvu, izvršene u korist bilo kojeg drugog državnog organa ili organizacije, nadležna institucija koja vodi registar društava će po službenoj dužnosti brisati i izvršiti upis prema odredbi stava 1. ovog člana."

Član 5.

Ovaj zakon stupa na snagu narednog dana od dana objavljivanja u "Službenim novinama Federacije BiH".